

Aruba, ehempel di durabilidad



DEN HAAG/ORANJESTAD – Percura pa economia duradero ta exitoso ta posibel solamente si comunidad duna e concepto aki suficiente sosten.

Esaki tabata e mensahe cu planologo strategico Geert Kooistra tabatin pa e mas o menos 80 bishitantenan di e encuentro di discusion

cu a wordo organisa dor di e 'Vereniging Antilliaans Netwerk' na Den Haag. Kooistra a wordo invita riba peticion di Minister Plenipotenciario Alfonso Boekhoudt pa bin duna un charla riba e proyecto Green'S'Cool. E proyecto aki ta un iniciativa Arubiano cu tin como meta involvi studiantenan den e

maneho ambicioso riba durabilidad di Gabinete Mike Eman II. Kooistra hunto cu Wubbo Ockels tabata hopi involvi den ehecucion di e proyecto aki.

Kooistra tabata asina hopi impresiona cu e maneho di Aruba cu el a skirbi su experiencianan riba e tema aki den un buki. Mientrastanto

e concepto aki a atrae atencion di tanto Merca como Europa cu a mustra interes. Durante e encuentro Antilliaans Netwerk a constata entre otro cu di tur e paisnan di Reino Aruba ta e pais mas avansa den haci su economia duradero. Un di e factornan di e exito aki ta e forma con gobierno di Aruba ta comu-

nica cu comunidad riba durabilidad, cuminsando cu e hubentud escolar, asina Kooistra a bisa e audiencia.

Riba e potretman di Nico van der Ven: Geert Kooistra y co autor Petra Maas hunto cu Roy Hart, kende a representa Cas di Aruba durante e evento aki. □